

清

史

稿

清史稿

列傳二百四

都興阿

富明阿

舒保

伊興額

關保

都興阿字直夫郭爾貝氏滿洲正白旗人內大臣阿那保孫父博多歡正黃旗蒙古都統都興阿由廢生授三等侍衛晉二等咸豐三年從僧格林沁赴天津剿粵匪破之於杜家肅擢頭等侍衛四年克獨流追賊阜城破連河濱賊壘五年克連鎮賊首林鳳祥就禽加副都統銜乾清門行走尋授京口副都統弟西凌阿督師湖北都興阿率馬隊往助勦復德安從總督官文進規武漢時官文軍北岸趨漢陽巡撫胡林翼軍南岸攻武昌都興阿率騎兵護水師敗賊沙口薄漢陽西門六年賊由金鋪山上竄都興阿揮步隊迎擊分馬隊抄其後斬敵甚衆焚團風鎮屯糧斬其酋林翼燔漢陽城外賊艇賊登岸遁都興阿以馬隊遮殲之擢江甯將軍襲樊土匪方熾都興阿馳援襄陽解其圍進圍武昌賊糧

肅援絕棄城遁復武昌漢陽乘勝克黃州興國大冶蘄水蘄州廣濟黃梅諸城
賜號霍欽巴圖魯大軍進規九江南路李續賓主之北路都興阿主之七年賊
山太湖竄窺黃梅都興阿空城誘之盡殲騎賊千餘其由獨山鎮來襲者馬步
合擊禽斬數千進攻小池口令多隆阿等破段樹楓樹坳獨山鎮賊巢陳玉成
大舉竄至都興阿令多隆阿出黃梅鮑超屯孔隴自督馬步攻渡河橋平二十
餘壘俘斬數千會合楊岳斌李續賓水陸軍攻童司牌盡平賊壘進克黃蠟山
先後殲賊萬餘玉成遁走詔都興阿幫辦官文軍務攻小池口燔其城遂會克
湖口破賊彭澤下望江東流八年會克九江被優叙復黃安麻城分軍破賊弼
陀鎮南陽河復太湖偕李續賓軍會攻石牌克之授荊州將軍會水師進規安
慶奪集賢關薄安慶北門破賊壘環攻而李續賓戰歿三河桐城舒城再失都
興阿率軍退保宿松多隆阿偕鮑超大破賊於花涼亭楚師復振九年曾國藩
奏請於安徽上游北岸添馬步三萬人以都興阿領其軍會病足薦多隆阿自
代詔赴荊州本任十年江南大營潰上命都興阿帥馬步援江北而以曾國藩

總督兩江時英聯軍犯京師都興阿備北援馳抵壽州和議成命赴揚州督辦江北軍務十一年令總兵吳全美率師船攻和州江下關毀賊壘破內江口賊船都興阿樂川楚軍胡林翼分其軍以界閩藩揚州兵單留徐州鎮總兵詹啟綸從剿令提督黃開榜焚三河賊船賊由儀徵犯揚州都興阿遣總兵王萬清防湖西自率三百騎出覘賊賊衆萬餘列陣待都興阿令騎皆下自席地坐賊疑有伏不敢逼後軍至奮擊破之賊又糾蘇州句容悍黨分犯瓜州鎮江都興阿乘其壘未成令營總杜嘎爾率馬步軍衝擊自督隊繼之賊大潰解敗綸乘勢踰毀甘泉山賊壘鎮江圍解調江甯將軍仍駐揚州督江北軍文武悉聽調度令副都統海全等破後石橋賊營賊由常州窺鎮江總兵黃彬統水師擊敗之都興阿馳抵天長城下平其壘卡賊酋魁長春遁走沿途截殺殆盡黃彬等破賊船小河口太平港平瓜埠賊巢尋會江南提督李世忠收降六合天長二城同治元年江浦浦口復陷賊進犯揚州北營甘泉山南互樸樹灣都興阿親督諸軍連擊敗走之時上游諸軍連克沿江要隘進薄江甯都興阿令總兵李

起高駛至浦口襲攻觀音門燕子磯爲聲援會國荃大營爲援賊所圍遣副將楊心純率二千五百人赴援入濠助守又令黃彬率水師援九洲二年賊謀入裏下河都興阿遏之不得逞別遣副將梁正源會江南軍焚中關下關賊舟李起高會收江陰三年江甯合圍江北無警而陝甘回亂益熾詔都興阿赴綏遠城督防時甘肅寧夏漢城陷於賊滿城待援召都興阿入覲關西安將軍督辦甘肅軍務署陝甘總督江甯克復論功予騎都尉世職六月都興阿至定邊奏言回酋馬化澂起雲州金積堡占踞城堡蔓延千里定邊距離尙遠宜進兵花馬池三路合攻方期得力令杜嘎爾等由草地繞石嘴山渡河攻克婆家村紅柳溝賊巢追至寶豐賊三路出撲擊敗之復寶豐解平羅圍軍進渠公堡都興阿慮深入無繼奏調荊州將軍穆圖善會剿賊首馬叱叶踞通成堡突出戰爲杜嘎爾等所敗退踞清水堡都興阿移營進逼絕其糧道攻克之進金貴堡王格莊去寧夏城二十里敗西路援賊城賊抄官軍後都興阿督諸軍迎擊賊大潰四年列陣城東誘賊出擊敗之拔南路賊圩鹽池固原竄匪踞安化元城

鎮窺寧條梁糧路都興阿遣軍分防花馬池定邊寧條梁而靖遠南山賊焚堡據壩修堰將決渠困官軍乃移屯城東南賊又踞隄築壘斷水道並擊退不得逞都興阿親督隊敗賊於金貴堡分軍屯定邊花馬池賊由固原趨平羅寶豐截擊於金貴堡敗之杜凌爾擊賊於磴口斃其酋馬生顏花馬池定邊兩路同捷賊首孫義和寧夏賊勢漸蹙詭辭乞撫計緩兵而潛決西河水灌官軍都興阿拒其降益修戰備進解滿城圍克城東賊圩敗之西門橋分軍擊走大水坑吳中堡踞賊斬回酋馬有富軍威頗振會奉天馬賊猖獗調都興阿盛京將軍移勦而以穆圖善代之穆圖善主撫寧夏賊尋降納礮械縛渠以獻五年穆圖善劾都興阿受降入城仍戮回酋章保立部下殺掠詔斥都興阿勦撫無定見下議褫職改留任都興阿至奉天馬賊漸平奏定緝捕章程搜勦餘匪尋定七年西捻張總愚竄畿輔李鴻章左宗棠率兵入衛賊流竄直隸河南山東數月未定詔召都興阿入京管理神機營授欽差大臣以副都統春壽提督張曜宋慶侍衛陳國瑞四軍隸之列名在鴻章宗棠上視師天津捻匪尋蕩平仍回

本任光緒元年卒於官賜卹贈太子太保諡清愍奉天士民請與大學士文祥將軍崇實合建三賢祠揚州亦請與將軍富明阿合祠西凌阿都興阿弟由拜唐阿授侍衛道光中從揚威將軍奕經援浙江迭晉頭等侍衛累擢察哈爾都統咸豐三年率黑龍江騎兵從琦善防浦口因不能阻粵匪北竄褫職留營責令追賊偕將軍托明阿等馳解開封圍又敗之汜水賊渡河圍懷慶援軍會集西凌阿戰最力圍解復原官追賊迭戰王屋邵原平陽洪洞由山西入直隸命幫辦勝保軍務至靜海賊蹤始定會軍圍攻四年春賊走阜城西凌阿追至後康莊破之從僧格林沁連破城外賊屯賊走踞東光連鎮攻戰數月西凌阿常爲軍鋒五年正月克之禽賊首林鳳祥予二等輕車都尉世職賜號伊精阿巴圖魯又從僧格林沁克馮官屯俘李開芳錫封三等男爵授欽差大臣督辦湖北軍務初至隨州戰不利命其兄都興阿往助尋褫職以官文代督師從復德安府城復原官留駐以固北防六年僧格林沁薦之率馬隊赴河南剿捻匪七年復以屢挫褫職留任破張洛行白龍王廟老巢復之八年命駐防山海關十

年授鎮藍旗蒙古都統從僧格林沁赴山東勦擒匪尋命幫辦軍務十一年戰荷澤失利下部嚴議破賊於東昌焚賊巢克七級鎮進克張秋又破曹州紅川口匪圩進敗賊於劉家橋大張寺同治元年以骸疾回京授鎮藍旗漢軍都統五年卒賜卹諡勇毅福興穆爾察氏滿洲正白旗人都統穆克登布曾孫以一品廕生授三等侍衛出爲直隸懷安路都司累擢督標中軍副將咸豐元年擢廣東高州鎮總兵二年平羅鏡匪凌十八及鬱林博白土匪賜號剛安巴圖魯擢廣西提督命援湖南偕向榮分路追賊湖北以遷延奪職留營三年從援江甯屯朝陽門外屢擊賊予三品頂戴充翼長偕提督鄧紹良破賊東壩復高淳會克太平回軍江甯迭擊賊於高橋門上方橋通濟門雨花臺營二品頂戴署江甯將軍母憂奪情留軍六年授西安將軍幫辦向榮軍務偕張國樑援鎮江敗賊丁卯橋江甯大營潰向榮退保丹陽上切責諸將福興革職留任榮病卒命偕張國樑同任防勦上聞福興與國樑不和諭怡良察之遂命福興赴江西會辦軍務七年復樂平攻東鄉金谿石達開自安慶竄浮梁樂平圍貴溪八年

正月福興至弋陽賊來犯福興兵少多爲疑兵賊不敢逼擊走之竄浙江福興進屯衢州東關賊迭來撲皆擊退回駐玉山防賊復竄廣信尋又赴衢州攻東關賊營福興右股受傷尋以傷重乞假召回京十一年署鎮紅旗漢軍都統同治四年從尙書文祥會剿奉天馬賊戰大凌河北井子禽斬甚衆進援吉林迭破賊於張登望城岡署盛京將軍五年禽賊首馬優仔於黃旗堡踪之事平凱旋授察哈爾都統調綏遠城將軍六年以舊傷發乞休光緒四年卒賜卹諡莊愍

富明阿字治安袁氏漢軍正白旗人叨兵部尙書崇煥裔孫崇煥冤死家流寓汝寧有子文弼從軍有功編入寧古塔漢軍五傳至富明阿以馬甲從征喀什噶爾授驍騎校洊升參領咸豐三年從欽差大臣琦善軍揚州戰於洞清鋪受槍傷裹創奮鬪斬敵數十擢協領特賜玉縣四年破賊瓜洲賜花翎管帶寧古塔兵五年戰虹橋戒所部距賊二十步始發矢射斃賊酋分兩翼搜伏賊賊潰走加副都統銜六年授寧古塔副都統迭敗賊於徐家集硯臺山攻瓜洲又率

隊及六合練勇攻江浦敗賊於十里橋賜號車齊博巴圖魯又敗賊於樸樹灣
土橋五新橋七年會攻瓜洲連敗賊富家井白廟以副都統記名是年冬克瓜
洲詔以副都統儘先題奏充江北軍翼長進攻江浦八年春迭破援賊復其城
進屯六合攻滁州克來安加頭品頂戴八月德興阿兵敗浦口富明阿馳援失
利傷亡幾半退儀徵收集散卒復成軍扼萬福橋破賊於運河東授署古塔副
都統偕張國樑克揚州儀徵又破賊於冶鋪橋九年德興阿以失律罷黜江北
軍不置統帥命歸和春節制別選謀勇可當一面者和春以富明阿薦劄辦
和春軍務時六合浦口皆未復富明阿督軍進攻迭戰百龍廟李家營及六合
城外既而賊數萬撲營分股繞襲後路遂大挫富明阿身被十二創詔許開缺
回旗醫治傷已成殘命以原品休致食全俸十一年召至京命訓練京營同治
元年授正紅旗漢軍都統管理神機營尋命赴揚州幫辦都興阿軍務江北裏
下河十餘縣未被賊擾鹽場之利如故偕都興阿疏請運鹽濟餉軍用得給長
江下游南北岸要口四十餘處排檣駐船分撥水師扼要駐防疏陳部署情形

詔特嘉其諳悉地勢賊屢糾捻匪窺伺江北迭擊走之分軍渡江助馮子材守鎮江是年秋親率精銳援臨淮會僧格林沁勦苗沛霖詔幫辦軍務令部將層啓綸克蒙額會陳國瑞等進攻連破賊沛霖伏誅傷發請假就醫准疏陳皖北圩練之弊詔下僧格林沁會國藩議加整頓三年春都興阿赴陝甘勦回詔促富明阿回揚州坐鎮署江甯將軍尋實授道層啓綸率兵渡江助勦克丹陽賜黃馬褂江甯克復予騎都尉世職仍督所部水陸諸軍留防江北於是裁撤紅單船由提督吳全美率回廣東酌裁陸軍數千疏言江甯駐防亂後僅存男婦六百餘人現設官二十七員兵二百五十八名稍存營制京口駐防尙存四千餘人官兵挑補足額俸餉不能全支房屋均已焚毀請飭撥餉修葺房屋使有依歸從之四年因骸傷未痊請開缺予假赴京醫治許坐肩輿至京仍命管理神機營傷病人不愈詔允回旗五年起授吉林將軍督勦馬賊力疾進搜山險遣將分捕數月肅清招撫金匪開闢閒田至數萬頃不及十年遂開建郡縣焉在任四年復以傷病陳情乞罷允之仍在家食全俸光緒八年卒優卹諡威

勸吉林揚州請建祠子壽山官至黑龍江將軍光緒中俄羅斯犯邊殉難永山官三等侍衛亦於鳳皇城拒日本力戰死事皆自有傳

舒保字輔廷舒穆魯氏滿洲正黃旗人由護軍累擢護軍參領咸豐四年從僧格林沁勦粵匪攻圍連鎮賊乘大風出竄舒保截殲之五年竄踞馮官屯引水灌之功最賊渠俘獲加副都統銜荊州將軍綿洵奏調赴湖北率馬隊破賊德安六年迭破黃州李先集團風賊壘胡林翼之圍武昌也官文令舒保率馬隊三百渡江助戰城賊援賊分八路來犯舒保以勁騎馳突賊大奔平魯家港賊壘又敗之沙子嶺小龜山雙鳳山旬日之間大小二十八戰胡林翼奏稱舒保馬隊之力特多賜號倭什洪額巴圖魯偕知府唐訓方合勦襄陽土匪迭敗之黃龍橋余山店解襄陽圍克樊城老河口賊巢復光化房竹山三城雪夜禽匪首高二張家集誅之襄陽平餘匪遁入河南境陷內鄉七年舒保躡至會豫軍殲之八年授鎮黃旗漢軍副都統舒保方駐防商城而賊由六安進犯湖北陷麻城急回軍趨黃州南勇敗於望天畝爲賊追逼舒保迎擊戰一晝夜賊始退

又偕李續宜破諸蘄水時欽差大臣勝保援固始兵未利而商城又告警勝保嚴檄舒保助剿胡林翼疏言舒保樸訥忠勇在楚有年洪山之戰襄陽之役蘄黃之捷實能爲人所難爲從無就易避難之意今以特簡二品大員勝保乃嚴札驅迫加以苛辭師克在和古有明訓束縛馳驟必誤戎機挾權任術馭不肖之將或可取快一時若忠良之士不煩督率而自奮也臣謂舒保一軍應審楚豫各路賊勢相機進剿毋庸強歸鄰省節制調遣上命舒保仍回羅田麻城剿賊固始圍解陳玉成復犯湖北舒保偕續宜破之麻城李續寶既克九江會師攻黃安下之旣而續寶戰歿三河楚邊大震舒保以所部四百騎自武昌東下林翼次黃州增舒保軍千人以新補西丹游牧蘄水上巴河而令率舊部赴太湖爲多隆阿聲援會別賊又陷德安黃州孝感諸府縣將軍都興阿檄調舒保未至奏劾其觀望下部議十一年偕道員金國琛會攻德安先克孝感復會水陸軍圍攻德安克之加都統銜同治元年授護軍統領粵捻諸匪分兩路竄湖北總兵穆正春擊其西路舒保擊其東路連敗之於黃陂廣濟應山賊竄回豫

境賜黃馬褂賊復回應山撲孝感城舒保啓南門奮擊賊已卻突別賊數千潛由北城入副都統德克登額署知縣韓體震等死之舒保還戰城中賊復敗逸追殺三十餘里二年賊由應城圍襲漢口爲官軍所卻轉撲孝感舒保迭戰李家灣倉子埠陣斬老捻千餘遂引去被珍賚三年擊捻匪於德安西追抵壽山日暮層岡深澗不利騎戰賊來登衆舒保陷重圍中越坎落馬力竭陣亡贈太子少保子騎都尉兼雲騎尉世職入祀昭忠祠湖北建專祠諡貞恪

伊興額原名伊清阿字松坪何圖哩氏蒙古正白旗人吉林駐防從征喀什噶爾除驍騎校選授侍衛入京召對宣宗以原名不合清語命改名伊興額道光十九年擢三等侍衛改隸滿洲咸豐二年自請從軍發揚州大營琦善令援江浦初至示弱不戰斫賊營大敗之柳樹壩破九洲洲累擡頭等侍衛賊圍和州急伊興額不待令督軍進擊解其圍駐江浦三年六年勦捻匪夏白任仲勉於滑河北岸殲賊二千餘仲勉斃於陣夏白糾雉河賊黨圍宿州伊興額率千騎往援四戰皆捷解其圍分軍防徐州宿州張洛行來犯偕總兵傅振邦擊走之

時額毫蒙宿諸捻蜂起徐宿百里內宴然耕獲不輟賊首王廣愛梁振貴衆數萬衆張七家樓圖北竄伊興額選精銳數百疾馳掩入賊壘禽王梁二賊賊黨來援擊走之以副都統記名賜花翎七年招降王家墟捻黨陳保元五千人斬其渠李月賜號額圖渾巴圖魯因病回徐州勝保劾其不遵調度報捷不實視翎頂尋率馬隊攻喬家廟禽斬捻首梁思住夜進攻鄆家墟誅賊渠劉大淵偕總兵史榮椿破賊趙家屯渦河兩岸肅清復翎頂八年授正紅旗蒙古副都統破捻匪於紀家莊解蒙城圍攻薛家湖賊巢礮傷股裹創力戰毀其墟加頭品頂戴尋捻首劉添祥由六安北竄衆號數萬伊興額以孤軍無援退屯蕭縣賊陷豐縣坐奪職九年春起佐傳振邦勦捻接統袁甲三所部兵詔復職督辦河南軍事伊興額率騎千三百赴援躡賊商水老湖坡賊衆數倍列車陣拒戰潛分兵繞賊後來擊之賊潰走窮追三晝夜歷沈邱項城至太和孫家圩先後斃賊二萬餘被旨嘉獎時總兵邱聯恩戰歿舞陽舞陽去商水二百里及戰勝舞陽賊聞風遁勝保復奏劾伊興額性情乖僻商水之役僅擊退別股並未迎剿

舞陽賊衆僅六千而疏報輒稱二萬三千詔奪頭品頂戴交勝保差遣所請獎
老湖坡戰勝員弁下署漕督袁甲三察奏伊興額遂謝病回徐州距復起僅三
月尋詔飭赴甲三營剿賊稱疾不赴蕭縣民鄭立本等以伊興額去賊復熾叩
閭請還鎮德楞額復代奏徐州紳民以伊興額在徐養病請飭就近治軍先後
諭詢伊興額病狀伊興額固以篤疾辭上怒褫職勒令回旗都察院奏上安徽
監生張鴻文呈言伊興額前功懇令總辦討賊事宜不報十年僧格林沁疏薦
予六品頂戴尋加三品敕辦徐宿團練伊興額再起其舊部多不隸麾下所將
五百騎未及訓練以賊竄曹州僧格林沁趣援十一年春偕徐州鎮總兵滕家
勝率騎二千馳往擊賊於東平汶上累捷追至臥虎岡風霾忽作急退楊柳集
伏起家勝馬蹶歿於陣伊興額揮百餘騎衝入賊中索之不得突圍出從騎僅
隨者十餘人賊圍之數日力竭死之詔復原官予騎都尉世職設壯愍建祠徐
州汶上宿州永城滕家勝湖南乾州廳人由行伍從江忠源剿賊湖北累擢游
擊繼從袁甲三剿捻於皖豫之間擢參將賜號伊博格巴圖魯勝保薦其少年

勇敢超授四川北鎮總兵調徐州鎮幫辦徐宿軍務家勝舊隸伊興額部下至是同戰歿贈提督子騎都尉並雲騎尉世職諡武烈

關保烏扎拉氏滿洲正黃旗人吉林駐防道光初從征喀什噶爾有功洊升三姓佐領咸豐三年隨侍郎恩華剿粵匪解懷慶圍追敗之平陽屯正定勝保檄充營總剿賊於深州靜海攻獨流鎮擢協領四年從僧格林沁戰阜城三里莊槍傷額舊擊破賊賜號年昌阿巴圖魯從勝保援臨清追賊至豐縣殲之以總管升用五年從僧格林沁克馮官屯從西凌阿赴湖北尋調河南又調安徽從和春克廬州加二品銜六年偕副都統麟瑞破賊五河斃黃衣賊目二人殲賊千餘敗邳州援賊解壽州圍擊賊嶺上五戰皆捷所部馬隊各省爭欲得之助勦尋隸河南巡撫英桂軍敗賊馬村橋進亳州雙溝遇賊姬橋殲之又連敗賊三丈口舊縣集安徽巡撫福濟疏調赴蒙城英桂仍請留河南詔令和衷商榷先赴所急其冬率軍趨懷遠越境敗捻匪於徐州漕運總督邵燦疏請留徐州報允七年偕總兵史榮椿攻永城岳家集捻首李月先遁焚其巢尋以病歸八

年命率吉林黑龍江察哈爾兵千八百赴袁甲三徐州營九年會攻滑北擒首
曹金斗破其圩乘勝擊擒首張寶全破之張洛行陷泗州踞草溝民寨關保率
民團奪圩外礮臺燬其寨賊分竄自相踐踏餘賊竄五河雙渡口奪船爭渡追
殲過半禽賊目張起等以副都統記名命幫辦傅振邦三省勦匪事斬擒首張
添福進擒任乾畢圩圩民內應斬乾餘黨盡殲接統伊興額軍命督辦河南防
務佐振邦勦匪三省如故授黑龍江副都統破亳州竄匪擒首孫葵心衆黨永
城圖分竄詔勿令攔入山東邊境飭關保截賊西路逼之歸巢已而賊衆二萬
分擾商邱柘城圍睢州開封戒嚴上命由鹿邑赴援賊趨蘭儀分擾通許尉氏
關保馳抵陳留合諸軍夾擊賊南走馳援許州遣副將王鳳翔率騎兵敗賊洪
河北岸又敗之臨潁城下陣禽葵心親屬孫奎夜簡精騎劫賊營斬敵無算拔
雉民千餘賊東奔偵別賊竄扶溝太康要擊之王隆集沿途搜捕豫境肅清十
年命勝保督辦河南軍務關保仍副之賊擾虞夏邑鹿邑遣將擊走之俄又大
至逼近省垣詔詰責尋轉戰汝寧確山皆捷分兵破賊鹿邑劉集解邱集團賊

復糾黨來攻擊走之傷發予假調理同治元年赴黑龍江任八年卒

論曰都興阿雅量寬閎知兵容衆胡林翼稱其有豐鎬故家遺風當時滿洲諸名將半出部下舒保亦以樸勇爲林翼所倚重及林翼歿無人善用倉卒殞寇世咸惜之富明阿始終江北軍事其助勞出托明阿德興阿之上晚膺邊寄亦稱賢帥伊興額勦捻盡瘁最得民心爲驕帥騎斂未竟其用關保善將騎羣帥爭相引重其遭際爲獨幸焉

清史稿

列傳二百五

袁甲三

毛昶熙

袁甲三字午橋河南項城人道光十五年進士授禮部主事充軍機章京累遷
郎中三十年遷御史給事中疏劾廣西巡撫鄭祖琛慈柔釀亂又劾江西巡撫
陳阡賄賂交通皆罷之戶部復捐例疏請收回成命咸豐元年粵匪起南河豐
北決口上疏極論時事皆切中利弊二年粵匪竄湖南疏言總督程希采爲守
土之臣責無旁貸若復令賽尙阿持節移軍誠恐諉過爭功互相掣肘請命賽
尙阿回京專責程希采便宜行事如有疎虞按律定罪並言湖北巡撫龔裕聞
賊入境託疾乞休尤宜嚴懲以昭炯戒又列欵奏劾定郡王載銓竇弄橫勢擅
作威福及刑部侍郎書元貪鄙險詐諂事載銓狀詔詰載銓所收門生實據疏
請飭呈出所給息肩圖事皆得實載銓坐削王俸奪領侍衛大臣兼官書元及
尙書恒春降調題圖者降謫罰俸有差於是直聲震中外三年命赴安徽佐侍
郎呂賢基軍務粵匪陷鳳陽府踞明淮關煽動土匪連陷蒙城懷遠甲三至軍

疏言賊勢未遽北犯請飭諸臣勿涉張皇急圖制賊命權廬鳳道漢回相聞圍
潁州遣兵解散誅首亂事即定會漕運總督周天爵卒於亳州命代領其軍時
土匪合五十八捻爲一勢甚張甲三至王市集收散勇整民國擊賊高公廟破
之加三品卿銜命署布政使疏辭不赴請專治兵事允之命專勦捻匪破賊標
里鋪禽其渠鄧大俊鄉團先後禽獻者二千餘悉置之法十月粵匪由安慶竄
踞桐城尋陷舒城呂賢基死之上命移軍桐城甲三疏言捻首張茂踞懷蒙間
窺廬郡請先赴蒙亳爲諸郡聲援時捻匪屬聚雉河集甲三令縣丞徐曉峯擊
破之禽賊渠孫重倫分兵擊敗臨湖鋪竄匪禽賊渠宮步雲馬九並其目數十
人令遊擊錢朝舉知縣米鎮攻懷遠大破之張茂負傷遁十二月賊陷廬州巡
撫江忠源戰歿甲三劾陝甘總督舒興阿擁兵坐視視其職並請撥兵防壽州
六安以杜旁擾四年二月粵匪陷六安竄蒙城甲三進擣蒙城賊走永城甲三
恐其趨宿徐阻糧道急躡之賊已濟河不及而還賊尋復南竄連敗之潁州正
陽關餘賊退六安還軍蒙亳剿捻匪擣臨湖鋪進逼雉河集賊空巢誘官軍甲

三偵知盡泊船南岸令知州張家駒陣河干參將朱連泰李成虎敗賊馬家樓
迫之渦河殲賊殆盡遂破義門集擒首張捷三遁去甲三移屯臨淮地數被兵
比戶凋敝既至討軍實撫殘黎衆皆樂爲之用超擢左副都御史疏言皖軍以
克復廬州爲急宜山偏師赴南路斷賊接濟尋以賊陷和州窺江浦將北竄分
遣將扼關山赴滁河鳩團練爲聲援十月北路擒匪復熾令張家駒朱連泰率
軍破之於寺覺集粵匪踞烏江令廬鳳道張吉第擊敗之賊夜結五壘於駐馬
河乘其初至薄之殲禽甚衆令參將劉玉豹舉人臧紆青規桐城連奪大小關
擊走廬江援賊紆青戰甚銳進攻桐城西門賊山安慶潛山來援城賊出應之
紆青戰死玉豹收餘衆退保六安五年疏陳軍事略曰北路以臨淮爲要正陽
次之臣駐臨淮牛鑑扼正陽以防賊北渡廬州爲中路和春福濟師老力疲久
攻不下西路蘄黃無處非賊兵力過單東路沿江鹹魚箐西梁山賊船賊壘來
去無常張光第等分軍進攻然無水師夾擊終難收效目下悍賊力爭江路羣
衆上游廬州有機可乘請益厚兵力分扼廬城東南或增兵並勦舒巢俾其應

接不暇庶可一鼓而下時淮北官吏甲三欲有更調和春福濟意不合甲三專奏詔仍飭會銜於是和春福濟疏劾甲三堅執已見並劾其株守臨淮粉飾軍情擅裁餉銀冒銷肥己召回京部議褫職甲三呈訴被誣下兩江總督按治事得白甲三在淮北得軍民心其去也軍民泣留者塞道未幾擒首張洛行勾結皖豫諸捻勢益熾懷遠民胡文忠黨子女徒步京師控都察院求以甲三回鎮格不達懷狀自縊言官孫觀曹登庸宗稷辰先後疏請起用疆臣怡良吉爾杭阿何桂清亦交章論薦六年二月命隨同英桂勦捻河南甲三赴歸德招集舊部三戰三捷進解亳州之圍毀白龍王廟砦破燕家小樓賊數萬直搗雒阿集禽蘇天幅洛行僅身免特詔嘉獎命以三品京堂候補洛行尋復糾黨犯潁州擊走之又踞雒河集七年平王鄧宋姚諸圩誅擒渠李寅等百餘人授太僕寺卿賜花翎勝保督師攻張洛行於正陽關久不下奏請甲三合剿令部將朱連泰史榮椿攻韓圩克之八年偕勝保解固始之圍復六安史榮椿破擒匪於銅山斬其渠孫大旺移軍宿州襲賊王家圩誅賊首王紹堂等乘勝復七圩七月

命代勝保督辦三省剿匪事宜張洛行方踞陳家莊擊走之分兵復豐縣未幾
蒙亳諸捻入歸德窺周家口甲三令子保恆偕總兵傅振邦馳援賊遽趨西北
偏開封振邦追賊及之太和李興集保恆集團勇扼橋口馬步合擊大破之殲
斃數千逐賊出河南境賜號伊勒圖巴圖魯疏言兵分則勢孤合則勢盛捻匪
踞地千餘里臣兵不過數千不能制賊死命請敕各督撫合力大舉爲掃穴禽
渠之計九年正月擊張洛行於草溝破其巢追至沱河多溺水死復擊之雙渡
口洛行泅水免勝保與甲三意不合屢疏詆之詔斥甲三督剿牛載但防徐宿
不擒賊巢日久無效召回京入覲而陳軍事四月命署漕運總督尋勝保以母
憂歸命署欽差大臣督辦安徽軍務實授漕運總督進攻臨淮關軍南岸斷其
糧道降捻內應斬關而入生禽賊首顧大剛等遂克之十年進規鳳陽屢戰皆
捷鄧正明以府城乞降張元隆猶據縣城誘出誅之並誅悍賊三百餘人未匝
月拔兩城詔嘉調度有方賜黃馬褂命其子保恆赴軍差遣捻匪陷清江浦窺
淮安令道員張學醇擊走之乘勝復全椒粵匪陳玉成來援分擾滁州令李世

忠夾擊走之是時江北無統帥揚州叛將薛成良擁衆剽掠亟發舟師扼高寶諸湖成良走依李世忠甲三寶以大義即縛獻成良斬之以徇令保恒合總兵張得勝副都統花尙阿各軍圍定遠陳玉成糾衆來援會合捻匪撲鳳陽據九華諸山連營數十里城中食且盡甲三令參將黃國瑞潛率銳卒四百夜薄九華山躍入壘城上發礮應之賊大亂棄營走圍乃解是年秋英法聯軍入京師車駕幸熱河甲三請率兵入衛詔以臨淮爲南北筦鑰止勿行和議定條上四事曰慎采納節糜費精訓練選將才下所司議行復疏請還京泰西諸國欲助兵討賊甲三力陳非策皆報聞十一年張洛行屯聚渦河北令李世忠擊走之練總苗沛霖者鳳臺諸生健猾爲閭里雄以團練功累擢川北道加布政使銜然不冠服令其下稱先生所平賊圩輒置長收其田租緣道設關隘壅斷公私渦河沿潁之間跋扈自恣甲三屢驅磨之用以牽制捻匪勝保尤信用沛霖沛霖亦深與結納內懷反側憚威不敢猝發至是藉口其練勇被害據懷遠圍壽州巡撫翁同書爲所劫持殺壽州團練徐立壯囚孫家泰亦自盡而壽州之圍

仍不撤遣其黨苟愷開犯河南受粵匪封職令練衆蓄髮四出搜掠於是詔禡
沛霖職命甲三會諸軍進剿同書罷去賈燾代署巡撫復於潁州被圍會張洛
行大舉渡淮甲三移軍擊之洛行敗走甲三屯長淮衛解散沛霖屬圩二百餘
處十一月保恒偕總兵張得勝等克定遠粵匪遁走進拔六合天長同治元年
會克江浦浦口移軍會多隆阿軍攻廬州克之陳玉成走壽州投苗沛霖執送
勝保軍誅之於是勝保爲沛霖乞恩免罪責剿捻自効佯奉命而徬徨如故甲
三策沛霖終爲患疏陳大勢先剿羣捻次沛霖薦李續宜撫皖而自移師會僧
格林沁軍擊捻匪上報可尋以病劇乞罷允之前因壽州失陷部議革職特詔
寬免既受代行至歸德疏陳四事請崇聖學議政親臣專心國事用人宜審聽
言宜斷上嘉納之復奏苗練終難就撫二年春沛霖復叛圍蒙城羣捻助之詔
甲三在籍會籌防剿臨淮軍苦飢乏甲三奉命急籌接濟乃倡捐募敢死士出
間道運至蒙城捻匪兩犯陳州甲三病已亟榻前授將吏方略擊走之尋卒優
詔賜卹諡端敏擢其子保恒侍講學士保齡內閣中書陳州臨淮淮安并建專

祠後淮安請祀名宦河南請祀鄉賢子保恒字小午道光三十年進士選庶吉士授編修從父軍中咸豐五年詔允留軍差遣七年從解亳州圍拔白龍王廟寺兒集雉河集賊壘進攻三圩戰最力勝保以聞加侍講銜賜花翎八年會攻懷遠擒首李大潛奪其輜重又大破孫葵心劉狗於太和賜號伊勒圖巴圖魯九年甲三罷軍事保恒回京供職十年復命保恒赴甲三軍破賊定遠幫辦軍務穆騰阿上其功甲三力辭上諭甲三不必引嫌十一年破苗沛霖黨張士端於懷遠會克定遠同治元年連擢侍講侍讀庶子甲三以病解職命保恒仍留軍尋丁繼母憂歸二年從甲三督治陝州團防甲三尋卒卹典推恩命保恒以侍講學士即補淮北初平保恒疏陳善後八策請以逆產絕產募民屯墾整頓兩淮鹽務以濟屯田經費又密陳李世忠驕恣難制請加裁抑三年保恒以屯田議未即行請詣京與廷臣面議詔斥不諳體制下部議降一級以鴻臚寺少卿候補服闋赴京廷臣交薦其才七年擒匪犯畿輔保恒自請効力戎行命赴李鴻章軍委用捻平加三品銜授侍講學士從陝甘總督左宗棠赴陝西八年

命筦西征糧臺許專摺奏事十一年遷詹事肅州克復加頭品頂戴十三年連擢內閣學士戶部侍郎保恆督餉凡五載諸軍欠餉糾葛騰挪無缺及大軍出關詔襄辦左宗棠轉餉事進駐肅州保恆請入覲未許光緒元年召回京兼署吏部侍郎二年調刑部侍郎保恆久歷兵間審於世變屢上疏論時事請辨人材厲士氣收人心言甚切直又言歷觀各國情形惟俄爲最強最狡往往不動聲色布局於十數年以前肆毒於十數年以後履霜有象桑土宜先伏願特簡久經戰陣熟習韜略之治兵重臣專辦東三省練兵事務凡屬兵馬餉糈邊防之事悉以屬之重以事權寬以歲月無事則可消覬覦之萌有事則可爲撻伐之助用以拱衛神京懾服他族根本至計未可委之一二不相統轄之武臣謂可威強鄰而彌外患也福建之臺灣僻處海濱物產豐饒民番逼處非專駐大臣鎮以重兵足以威信舉民風吏治營制鄉團事事實力整頓未易爲功若以福建巡撫每歲半載駐臺恐閩中全省之政務道路懸隔而轉就拋荒臺灣甫定之規模去住無常而終爲具文請改福建巡撫爲臺灣巡撫駐臺而以總

督辦福建全省事各專責成疏入下部議行三年河南大旱命保恆瓊辦賑務既至疏陳沿途流民狀先令州縣停徵四年奏請截留江南漕糧九萬石不許請借直隸平糶餘米三萬石許之又請借用江蘇義倉積穀及臺灣捐修鐵路洋銀五十萬圓下部議令籌歸還之法保恆請緩禁川鹽行楚加抽鹽釐備抵賑需爲兩全之計疏入仍下部議保恆查賑所至屏絕供張服食粗糲刊賑章二十二則頒行就孔道設粥廠就食省城者凡十餘萬人栖息得所時親視察感疫病卒優詔賜卹諡文誠河南省城建專祠附祀陳州臨淮甲三祠

毛昶熙字旭初河南武陟人父樹棠官至戶部侍郎昶熙道光二十五年進士選庶吉士授檢討咸豐五年遷御史轉給事中屢上疏論軍事吏治勦步軍統領聯順徇私廢法罷之甚負清望八年授順天府丞胡林翼密疏薦之十年加左副都御史銜命督辦河南團練至則規畫全局定條規十二事築堡寨扼要隘擇首事選團丁籌公費互救援定約束申號令公賞罰詰奸宄旌忠義而終之以實力奉行并疏陳調練民勇苦累之弊亟宜改辦鄉團以紓民力尋命督

辦勦匪事宜駐軍歸德亳州擒匪犯鹿邑督練勇擊走之分路馳勦九戰皆捷
十一年疏言擒騎逾萬官軍馬隊過單皖豫交界之區皆平原曠野步隊無以
制賊死命今豫境修築寨堡已有成效應責令寨長各選壯丁一名馬一匹投
效來營歸陳兩屬約可得馬隊三四百名上命推廣其法行之擒匪偪省城圍
通許昝熙檄軍援之圍立解因疏言軍令不一將士無所適從宜會合撫臣以
一事權上命巡撫嚴樹森督辦河南勦匪事宜昝熙副之仍兼辦團練三月克
唐縣擒匪趙國良犯兗州陳大喜犯汝陽并擊走之尋以誤用逃犯李占標降
三級調用暫免開缺大河以南府廳州縣團練皆成立屢敗賊詔開復處分連
擢順天府尹太僕寺卿內閣學士仍留軍穆宗即位昝熙請謁文宗梓宮面陳
機要未許命以軍事密疏入告疏上制擒要策略曰年來勦擒未得要領其誤
有二一在專言防堵賴徐歸陳平原千里無險可扼擒數路同發分而愈多官
軍分堵則兵單合堵則力疏猶之院無牆垣徒守門戶不能遏盜也一在無成
算而輕戰賊衆數倍於我馬則十倍過之我無必勝之術僥倖一戰一旦敗潰

賊餓愈張至會師擣老巢實爲平賊要策皖捻雖以張洛行爲主而陳宋穎壽淮徐方數百里無處非賊巢即無處無賊首官軍即能次第掃除勢難刻期淨盡若繞過小捻徑擣大捻老巢舍近攻遠而近賊襲我於後我必不支此會擣老巢之難遽奏效也然捻匪與粵匪不同粵匪蠶屯蟻聚其勢合捻匪散處各圩其勢分其出竄也必須裝旗糾合各圩賊目約期會舉常十餘日始得出其竄山東者每會於保安山龍山竄汴梁者會於小柰集大寺集竄陳州者會於南十字河張倍溜地皆偏近亳州亳州者賊之吭也計莫若擇重臣素有威望者統步隊數萬馬隊數千屯軍於此用伍員多方誤楚之法分所部爲數起此歸彼出此出彼歸循環馳突於各捻賊圩之間使大捻無從勾結小捻聲息不通惴惴焉日防官兵之至自不能裝旗出竄四出打糧俟其飢困然後以重兵次第圍剿賊無外援則小股膽落大股易平招撫兼施立可解散不必盡煩兵力矣夫防賊於旣出之後何如遏賊於未出之先剿賊於旣聚之餘何如燧賊以難聚之勢而又無勞師襲遠之危輕進損威之失所謂不戰而屈人之兵者

是也今日大計以衛畿輔固根本爲先豫東者畿輔之門戶也亳州者豫東之賊源也亳州之賊不除則豫東之匪難絕卽畿輔之地不安重兵駐豫不能兼顧東省駐東亦不能兼顧豫防惟亳爲諸捻匯處之區拔本塞源實在於此且蒙亳百姓祇以偏處賊巢呼訴無門不得不苟全性命非盡甘心爲逆也若官軍聲勢一振隨撫隨勦不但忠義良民同心殺賊卽附賊之堡寨亦相率就撫輔助官兵彼久經兵革之地人習戰爭附賊則爲悍賊反正則爲勁兵奪賊餉而益軍威計無便於此者前勝保袁甲三累獲大勝皆由屯駐亳州扼其要害并賴關保德楞額馬隊之力是以所向有功前事不遠可爲券證奏入上覽之時粵捻合擾潁州命昶熙出境會勦昶熙兵僅五千且無馬隊疏請調總兵李續巖等募精壯六千來豫以厚兵力如所請行上復敕西安將軍托明阿選西安馬隊一千赴豫同治元年春亳捻劉大淵糾黨趨河南昶熙在省聞警馳至杞縣賊已圍城會僧格林沁軍自山東進至敗賊許岡昶熙會所部合擊之克復所占民圩斬賊逾萬餘賊引去檄諸路團勇截殺之還駐歸德扼賊歸路四

月會同僧軍合擊金樓教匪楊玉驄盡殲其衆授禮部侍郎仍命督團勦賊歸
僧格林沁節制赴汝寧督兵團勦陳大喜諸匪克正陽收寨圩多處二年誅賊
首張鳳林張福林克那集尙店賊巢陳大喜竄湖北汝寧陳州所屬蹂賊殲除
殆盡調吏部毫捻犯陳州爲官軍所扼擊四竄杞熙屯鹿邑盡平毫北賊寨是
年冬苗沛霖伏誅淮北肅清詔杞熙部勇原助兵力所不足今兵力足數應用
飭散遣歸農命杞熙回京供職會陳大喜勾結苗練餘黨趨汝南陷正陽信陽
新蔡息縣各民寨乃暫留勦賊三年進屯息縣禽誅捻首趙國良徐文田十餘
名盡復諸寨十一月僧格林沁敗陳大喜張總愚於光山賊西竄徧南陽杞熙
調張曜回屯唐縣知府湯聘珍扼宛南四年僧格林沁戰歿曹州諸軍并被讎
坐革職留任詔回京六年調戶部七年擢左都御史兼署工部尙書時捻匪戡
定疏陳軍務漸平宜益思寅畏略曰功成而喜者常人之同情功成而懼者聖
人之遠慮今日巨寇甫平兵戈未息滇黔秦隴烽火驚心皖豫直東瘡痍滿目
戡亂安民一一尙煩宸慮敬肆之機間不容髮萬一大捷之餘偶忘乾惕則患

機之萌恐有伏於無形者今之所急一在勤聖學皇上春秋鼎盛典學日新但恐親師講學爲時無多還宮之後左右近習或以功業日盛間進諛詞意氣漸盈懋修或懈昔宋莊獻皇后臨朝仁宗聽內侍之言欲觀寶玩莊獻太后爲言祖宗創業之艱臣亦伏願皇太后於皇上還宮之餘殷殷以時事艱難勤加敎迪至於近侍尤宜擇老成有識之人服事起居將見養正之功日臻堅定矣一在崇節儉今寇亂雖平而流離之民未盡歸農荒蕪之田尙多未墾非力加撙節不足以廣積儲而備緩急臣前管三庫事務見內務府借撥部庫銀兩逐歲加增竊恐中原底定踵事增華財源未開財流不節度支告匱爲患匪輕伏願皇太后皇上崇尚節儉爲天下先一切不急之務可罷則罷之可緩則緩之庶國用可充而風俗亦漸歸質厚矣一在飭吏治髮捻之禍實由不肖州縣所激而成正供之外百計誅求私派私罰自營囊橐以致民氣不伸釀成巨患用兵以來此風尤甚卽如釐金一項奉行不善百弊叢生病商病民莫此爲甚今日之封疆大吏以地方多事喜用精明強幹之員而不求愷悌循良之吏斯民元

氣剗創愈甚其禍遂不可勝言今東南初定畿甸甫清兵燹遺黎不堪再擾應令各省督撫慎選良吏與民休息以復富庶之舊一在固根本陝西回逆土匪廣聚北山見聞大軍乘勝西征恐至窮而思竄其或由晉省撲河或由草地北擾宣大畿輔兵單地廣在在須防直隸提督劉銘傳謀勇兼優應令迅回本任並帶所部萬人留直屯守以壯聲威並將綠營兵丁練成勁旅庶諸賊不敢萌心北擾而諸將亦得專意西征矣疏入上嘉其言剗切優詔答之八年授工部尙書命在總理各國事務衙門行走九年天津民教構釁命偕直隸總督曾國藩按治暫署三口通商大臣事定回京請裁歸總督兼理從之十一年調吏部十二年上謁東陵命留京辦事十三年兼翰林院掌院學士光緒四年丁母憂服闋命仍在總理各國事務衙門行走兼翰林院掌院學士八年授兵部尙書尋卒優詔賜卹贈太子少保設文達昶熙屢掌文衡兩典會試凡朝殿考試閱卷厯二十餘次士論歸之

論曰袁甲三毛昶熙並以謇諤著聲出膺軍寄甲三孤軍支柱淮堦與捻事相

終始驕帥傾排狡寇反覆卒能保障巖疆其堅毅不可及也昶熙事權未專同時疆吏非辦賊才補苴之功亦不可沒所陳平按方略具得要領賊平之後勲懃以寅畏納諫老成謀國於斯見之保恒濟美戎行立朝侃侃家英國幹鬱有風規已

清史稿

列傳二百六

劉長佑

劉獻昭

岑毓英

補 缺 實

劉長佑字印渠湖南新甯人道光二十九年拔貢與同縣江忠源友咸豐二年忠源率鄉勇赴廣西助剿長佑從粵匪自桂林走湖南忠源破之於蓑衣渡長佑有贊畫功獎叙教諭又從破瀏陽徵義堂會匪擢知縣三年平衡山土匪擢同知直隸州忠源援湖北遇賊崇通間長佑自長沙馳援戰於通城大破之自是獨領一軍忠源守南昌長佑偕羅澤南赴援解吉安圍分兵克泰和擢知府忠源殉廬州長佑偕忠源弟忠溶率千人馳援弗及大憤誓滅賊五年江忠淑勦東安賊不利賂秉章以長佑兼統其衆所部始盛克東安追破之新甯六年復彬州擢道員江西賊方熾秉章奏以長佑率蕭啟江等諸軍赴援克萍鄉加按察使銜遣啟江復萬載進圍袁州屢擊敗援賊十一月降賊李能通爲內應克袁州七年二月進屯太平城賊由吉安大舉來襲列陣二十餘里以驍騎衝

突將士多死亡全軍敗潰長佑下馬引佩刀欲自裁營務處劉坤一擁之上馬退保分宜近縣士民爭運糧械濟之潰卒皆來歸軍勢復振進規臨江八月石達開自撫州率二十萬衆來援總兵普承堯戰峽江不利賊薄太平城長佑乘其營壘未定約蕭啟江田興恕合戰江忠義李明惠先陷陣盧秀峰繞其後縱擊大破之遂圍郡城捷聞詔嘉其奮勇賜號齊普巴圖魯十二月克臨江殲賊曾張發紀加布政使銜八年長佑病歸以劉坤一代統其衆蕭啟江自爲一軍合克新淦崇仁進克撫州是年夏長佑復至軍屯建昌迭敗賊於新城金谿賊入福建界江西邊境肅清記名遇江西道員缺簡放九年回軍湖南剿郴桂賊解永州圍記名以按察使題奏石達開圍寶慶長佑與李續宜分扼東西兩路賊敗走長佑追破之九鞏橋白楊埔大臨橋蘆洪司遂竄廣西陷興安靈州直撲桂林長佑倍道赴援賊不虞其驟至走慶遠追擊之所向皆捷授廣西按察使逾月擢布政使攻柳州拔之十年擢廣西巡撫四月克慶遠破達開於思恩又破之興安乃遁竄時廣西土匪猶蔓延大者踞郡縣小者千百爲羣倏兵倏

賊長佑莅任整飭吏治興練水師匪氛漸輯商貨流通稅釐增倍軍事餉事差能自固不盡仰資鄰省十一年遣劉坤一剿柳州土匪斬其渠伍聲揚餘黨就撫調水陸軍剿潯州艇匪克府城斬其渠陳開貴州匪首黃金義投誠復叛禽斬之同治元年長佑親赴潯州督防分軍進剿迭克要隘尋擢兩廣總督以所部楚軍付劉坤一接統留勦廣西諸匪未幾調直隸總督時降捻張錫珠宋景詩先後叛畿輔騷動二年春長佑航海至天津即赴衡水督師三月破賊束鹿殲張錫珠命督辦直隸山東河南三省交界剿匪事宜宋景詩踞劉貫寨甘官屯合山東軍攻之以遲延降級留任九月破賊張秋鎮殲賊目楊殿一景詩逸走乃罷軍四年僧格林沁戰歿曹州捻匪益熾畿南戒嚴長佑遣兵自開州至張秋扼河防奉天馬賊入喜峰口坐疏防護處八月捻匪竄山東濮范南岸長佑馳赴大名擊走之疏請直隸分練六軍議定營制加練二軍下部議行六年滄州梟匪張六等劫慶雲鹽山甯津南皮四縣鹽場山東教匪應之保定天津河間三府屬皆騷動長佑檄前藩司唐訓方屯齊河臬司張樹聲屯張秋防捻

自率兵剿捕鹽梟賊乘虛北走過渾沱河衆增至千餘竄擾涿州固安永清霸州逼近京師詔褫長祐職以大學士官文代之命下數日而梟匪平予三品頂戴率所部回籍尋東檢平詔念前勞晉二品頂戴十年起授廣東巡撫尋調廣西初奸民出關劫掠越南官兵不能制悍酋吳終伏誅而蘇國漢復起九年廣西提督馮子材進軍龍州國漢旋乞撫於兩廣總督瑞麟仍招納亡命匪首鄧建新曾亞日分路肆擾至是總兵劉玉成禽亞日於上林社誅之復會廣東軍攻克舊街乘勝抵海甯匪多散亡國漢奔東興亦就禽長佑奏言論越南大局則宜直搗河陽一勞永逸然河陽距關二千餘里窮兵勞費討捕爲難今擬芟蕩海陽太原卽回師列戍以固藩籬庶可分助越之衆協剿黔苗抽出關之兵先清土莽十月副將陳得貴遊擊李揚才克越南從化府遂會劉玉成克通化白通破瓊山北山匪集十一年正月復敗匪於三星山禽其酋何三等餘黨悉平長佑檄劉玉成暫屯鎮撫咨越南國王遣兵換防久之不至又以營弁滋事暴兵非計七月乃撤入關內搜捕沿邊伏匪時匪酋黃崇英猶踞越南河陽結

白苗攻保樂擾我鎮安邊十二年春長佑檄關內外軍擊走之密奏越南貧弱版章日蹙法國蠶食於濱海黎裔虎視於橫山桶岡則白苗跳梁崑奔則黃酋雄踞近聞其國君臣輸款法人黃崇英受職黎裔雖係道聽之言亦保意中之事臣竊謂黎裔爲患越南受之法國爲患不僅越南受之今欲拯敝扶衰必須大舉深入若合兩粵之力寬以數年之期步步設防節節進剿庶交夷可期復振而他族不至生心否則惟有慎固邊防嚴杜勾結而已是時防越諸軍尙八千人長佑檄劉玉成引軍北還以六營屯關外諸隘四營屯歸順龍州令覃遠璫八營分駐關內十月法人攻陷河內黃崇英等乘機襲太原潛與之通山西奸民響應北甯戒嚴越南乞援乃令劉玉成統十營進太原爲左軍道員趙沃統十營分部鎮安爲右軍法人尋與越南議和黃崇英爲越將劉永福所敗潛伏河陽遣黨陳亞水攻保樂十月長佑閱兵南甯令趙沃劉玉成進軍光緒元年二月趙沃右軍由龍關渡河克同文白苗棄巢遁沃撫之爲助遂攻底定襲安皆克之劉玉成左軍敗賊白通陣斬鄧志雄崇英聞師至嚇周建新拒左軍

陳亞水守猛法自當右軍憑險拒守五月沃軍克淦台直薄河陽崇英敗走右軍復敗陸之平援衆進攻猛法陳亞水惶懼乞爲內應河陽安邊同日降崇英遁走捕獲誅之劉玉成左軍亦克通化白通斬周建新合攻者巖克之陸之平遁宣光金沙江上下肅清凱撤入關擢雲貴總督二年抵任先是滇邊野番殺英人馬加理爲交涉鉅案及議定尤於雲南設埠通商詔下其議長佑疏言雲南山川深阻種人獷悍成性剽掠行旅本地紳練恃衆橫行挾制官長上下猜忌法令不行萬一防護不及致有同於前案或更甚於前案其有害於雲南一隅猶小其有撓於中夏全局甚大且洋人知前案難辦有免其既往之議知後患難防有保其將來之議臣恐滇省官民於已往者不以爲倖免而以爲得計將來者不引爲前鑒或敢於效尤洋人通商意在圖利亦斷無不思遠害之理應俟三五年內外官民稍稍安定遣員商辦長佑以滇事漸定屢疏引病乞罷優詔慰留四年騰越徼外土目耿榮高等攻陷耿馬長佑遣將討之榮高降又剿平臨安開化廣南土匪初騰越蘇關先之亂其黨劉寶玉逃之野山野山在

滇緬之交其夷自爲君長不隸疆屬劉寶玉糾野實十三種及盞達羅夷伏羅
坤山時出劫掠會緬甸遣官詣騰越持圖說約由野山通道列戍長佑檄熊昭
鏡赴騰越召諸土司野實申禁約誘誅寶玉於千崖諸野夷皆解散七年法兵
窺越南東京詔滇粵備邊長佑疏言法人自據嘉定以來越南四境皆有商埠
教堂脅其君臣漁其財力取越與否非有甚異其所以處心積慮乃在通商雲
南與其既失越境爲守邊之計不若乘其始動爲弭釁之謀滇粵三省與越接
壤東西幾二千里要害與共勞費殊甚若自三江口以至海陽東西僅數百里
以中國兵力爲之禦敵兵衆而力省以視防守滇粵邊境勞逸懸殊請以廣西
兵二萬爲中路廣東雲南各以萬人相犄角廣東之兵自欽連而入雲南之兵
出洮江而東別以輪船守廣東順化港口斷其首尾法人必無自全之理又力
言劉永福可禦敵請密諭越王給其兵食疏入詔下廷議八年法兵陷東京越
匪紛起廣西援兵至太原長佑檄道員沈壽榕率軍出關與爲聲援長佑屢以
病乞罷慰留未許八月入覲予假兩月九年乃許開缺回籍尋坐雲南報銷失

察降三級十三年卒於家詔念前功嘉其端謹老成開復處分仍依總督例議卹設武愼廣西雲南湖南並立專祠

劉嶽昭字藝臣湖南湘鄉人以文章投効湘軍咸豐六年從蕭啟江授江西轉戰積功累擢以知縣用啟江器其才使領果後營七年破賊高安雋哥嶺連拔彭家村賊巢進攻臨江擊敗援賊於太平墟尋克臨江府城擢同知八年從勦撫州賊大捷於何家村香溪諸處崇仁賊踞白陂墟又破之由上賴渡進逼撫州賊開東門逸復其城擢知府賜花翎九年援南康克新城墟進擄池江前軍潰嶽昭殿後斃賊甚衆克南安授信豐解其圍加道員銜石達開由江西擁衆犯湖南嶽昭移軍茶陵備之而賊已趨寶慶奉檄馳援至柳家橋遇東路賊六萬餘撲營嶽昭偕副將余星元楊恒升等鏖戰三日斃賊數千援軍大集賊解圍而遁是役嶽昭戰最力名始顯十年屯江華賊酋陳金剛踞廣西賀縣阻山爲固嶽昭招降其黨進拔蓮圻縣破河東街賊屯合蔣登澧軍克縣城以道員記名加按察使銜是年冬連破竄匪於道州宜章湘境肅清賜號鼓勇巴圖魯

十一年略秉章赴四川督師疏請嶽昭率所部從行中途聞粵匪陳玉成犯湖北陷隨州秉章令嶽昭回軍赴援會諸軍克之以按察使配名石達開由龍山犯宣恩窺伺施南嶽昭迎擊走之而黔匪陷來鳳同治元年春嶽昭進軍克其城分軍截剿迭捷於散毛河白蘭壩兩河口抵黑洞斬敵尤多石達開竄四川圍涪州嶽昭會知府唐燭副將唐有耕破之仰天窩渡江重慶截擊解涪州圍賊敗踞長甯攻克之復追敗之先市寨得用壩丁子場賊尋踞叙州雙龍場約降賊郭集益內應破其營殪賊近二萬貴州巡撫張亮基疏薦其才請擢用二年授雲南按察使三年遷布政使皆未之任留四川治軍略秉章奏遣援黔九月克仁懷連敗馬躍灘踞匪四年克正安追賊至清溪河斬其渠五年擢雲南巡撫進規綏陽天台山最爲城北險隘列陣縋其前從山後攻入平其壘投誠者三百餘寨綏陽城賊吳元彪乞降黔西北路始通由溫水進勦平棗竹山老巢收降鐵匠坪九倉壩及被脅嚴洞二十餘處六年破沙窩踞賊解大定圍拔大屯朶壩賊壘會滇軍平豬拱箐苗又拔平遠牛場地苗巢黔西肅清七年疏

陳雲南軍事命赴本任尋擢雲貴總督駐軍曲靖進攻尋甸破七星橋木城扼
文筆山法鼓山要衝剽平附近村莊賊壘收復果馬叠捷於塘子張徐灣諸處
援賊大至圍攻果馬各營皆陷革職留任八年解馬龍圍進逼尋甸賊首馬天
順李芳圓乞撫遂復其城雲南捻亂已久各軍惟布政使岑毓英所部最強而
毓英素尙意氣嶽昭開誠專任調發進止悉聽之毓英尋擢巡撫和衷無牽制
軍事日有起色九年克麗江復威遠姚州復永北鶴慶鎮南鄧川浪穹拔鳳羽
白米莊賊巢平彌勒縣竹園踞匪十年平永善蠻匪拔賓州賊巢平香爐山積
匪連克河西之大東溝小東溝及臨安之五山夷寨十一年復貴州興義新城
先後克永平雲南及趙州蒙化廳各城攻大理上下兩關復大理府城誅大酋
杜文秀昭復原職十二年滇省肅清賜黃馬褂疏請陞見光緒元年以入覲還
延御史李廷簾劾其規避下部議視職九年卒署湖南巡撫應際雲疏陳嶽昭
統兵十餘年建功之地黔屬爲多任事之艱雲南爲最請復原官昭允之嶽昭
之規尋甸也杜文秀遣黨萬餘戰不利從弟嶽陵請嶽昭速還曲靖以固根本

賊果分黨往襲以有備不得逞嶽峻守馬龍賊圍之伺隙出擊走之固守數月練兵得三千人會攻尋甸破七星橋要隘賊乞降猶懷反側嶽峻率三十人入城示以坦白人心始定次日毓英兵亦至服其膽略嶽峻先以積功擢至道員嶽昭至滇後專任毓英滇軍其舊部多遣去云

岑毓英字彥卿廣西西林人諸生治鄉團擊土匪以功敘縣丞咸豐六年率勇赴雲南迤西助勦回匪九年克宜良權縣事十年克路南署州事擢同知直隸州進攻澄江兼署知府十一年克徵江賊壘破昆陽海口賊迤西回匪連陷楚雄廣通祿豐省城戒嚴毓英赴援同治元年破賊大樹營時總督張亮基引疾去巡撫徐之銘主撫回曾馬如龍通款毓英往諭順逆如龍獻所踞新興等八城之銘奏以毓英攝布政使尋以安撫功加按察使銜賜花翎二年回弁馬榮叛戕總督潘鐸毓英率所部粵勇一千與弟毓寶等守藩署之銘微服詣毓英司道皆集分兵守東南門密召馬如龍入援如龍至誅亂黨馬榮跳走南寧合馬聯陞踞曲靖八屬詔嘉毓英守城功擢道員率師西勦復富民安寧羅次高

明祿豐武定祿勳廣通陸涼南安諸城及黑元永三鹽井進擣楚雄會東賂有警之銘檄回省分兵克階益平并赴楚雄督攻克其城進復大姚雲南趙州賓川鄧川浪穹鶴慶分道進規大理上下關三年克定遠圍攻鎮南大破援賊於普棚馬聯陞復陷霑益犯馬龍回軍破之於天生關進攻曲靖復馬龍霑益進克尋甸禽馬榮馬興才克曲靖禽馬聯陞並誅之尙書趙光疏呈演紳公啟言毓英所向有功特詔嘉勉下總督勞崇光據實保奏四年肅清迤東加布政使銜賜號勉勇巴圖魯西路自毓英軍移去所克諸城多復陷僅存楚雄未失毓英駐軍曲靖護省城運道五年命署布政使勞崇光至是始至滇受事奏以提督馬如龍專辦西路令毓英督剿豬拱箐苗豬拱箐隸貴州威寧州與海馬姑相倚角山溪阻深苗酋陶新春陶三春分據之糾衆苗教諸匪及粵匪石達開餘黨凡十數萬人迭擾滇之鎮雄彝良大關昭通黔之大定黔西威寧畢節且及川疆三省會勦久無功毓英上書賂秉章請權不一則軍不用命願率滇軍獨任期百二十日覆其巢授迤西道署布政使如故六年擢布政使二月師抵

豬拱箐令張保和林守懷領二千人由大溜口出二龍關後掩襲吳家屯自督
三千人攻關賊傾巢出戰關後敵發賊回救統英揮軍夾擊三隘皆下遂奪吳
家屯禽斬數千賊自海馬姑來援截擊之斬其酋餘賊反奔令蔡標劉重慶分
軍圍勦海馬姑克紅巖尖山賊援乃斷遂逼豬拱箐老巢賊以巨石自山顛墜
下驅牛馬突營將士多傷亡統英督軍搏戰斬悍酋賊始卻於營前掘深坎賊
所發石盡陷坎內誘降獮人得賊盧實選敢死士二千填濠以進連破木城二
直擣其巢縱火焚之斬賊二萬禽陶新春及其死黨磔之拔出男婦四萬餘人
乘勝合攻海馬姑伏兵山前後進毀賊壘三十餘以噴筒環燒禽陶三春及悍
酋二百餘人皆斬之賊悉平計自進兵至是僅逾期四日加頭品頂戴馬如龍
勦迤西屢失利勞崇光病歿杜文秀大舉東犯連陷二十餘城省垣告急是年
冬統英自豬拱箐凱旋曲靖先遣弟統寶助省防七年春揚言師出陸涼而取
道宜涼七甸連破大小石壩小板橋古庭庵金馬寺賊壘進屯大樹營馬如龍
來會人心始定昆陽匪首楊震鵬夜渡昆明池襲省城統寶擊敗之震鵬負創

遁進攻楊林毓英鼻受槍傷回軍省城連破石虎關賊壘禽賊渠李洪勳擢授
巡撫附省賊壘猶繁與之相持總督劉嶽昭初至滇由馬龍進勦尋旬失利賊
勢復熾毓英疏陳軍事餉事略曰杜文秀竊踞迤西十有三載根深蒂固今擬
三路進兵一出迤南牽賊勢一出三姚永北斷賊援大軍由楚雄鎮南直搗中
堅使賊面面受敵不能兼顧臣選精銳六萬更番戰守既無停兵之時亦免師
老之患兵勇無須外募以本省兵勦本省賊既習地利復熟賊情見在滇省兵
勇鄉團已調集八萬有奇擬俟附省逆壘肅清認真裁汰選定精銳以資得力
滇省綠營額設馬步兵三萬七千數百名承平日久訓練多疏將不知兵兵不
知戰倉卒有事則募勇以代兵餉需支絀不能不後兵而先勇於是兵丁愈困
營務益弛通省營兵所存不及十一臣擬卽此六萬人中擇補營額目前仍令
隨征事竣再飭歸伍既有常業自有恒心責以成功收效必速滇省近年用兵
多藉鄉勇之力擬按州縣之大小定徵調之多寡共編鄉勇四十營分兩班隨
營征討餉銀仍由各地籌捐兩年之內迤西肅清即可裁撤歸農滇省兵勇向

於餉銀之外每名月支米三斗見擬用兵六萬每年共需米二十餘萬石爲數甚鉅歷年皆按成熟田畝酌抽釐穀約十分取其一二資助軍食與川之津貼黔之義穀名異實同今請照舊抽收並將近年可徵地丁抽糧全數改徵糯米如不敷用再行籌價採買接濟一俟軍事肅清分別裁止滇省綠營官兵俸餉有閏之年需銀七十萬兩有奇無閏需銀六十四萬數千兩見既易勇爲兵則餉銀較勇糧稍厚倘因籌餉維艱每月先給半餉加以賞需軍火各費約共需銀八萬兩鹽課地丁釐稅之外每月所短不過三四萬兩應由外省協撥較之向例協餉有減無增若發全餉則每月應由外省撥銀六萬較常例所增亦屬無幾見在部臣指撥各省協演軍餉如浙江廣東江西距演較遠籌撥起解往返經年緩難濟急請飭改作京餉另由川楚等省應解京餉改撥濟演兩無窒碍至於選任領將宜不拘資格不惜情面凡有能將三千兵以上才當一而者雖其名位尙卑亦宜委署要職其謀勇平常僅止熟習營務縱係實缺另予差遣勿使倖位疏入下部如所議行八年春賊酋楊榮率衆數萬踞楊林長坡分

黨踞小偏橋十里鋪羊芳凹牛街興福寺省城大震毓英督諸軍分勦奪回小偏橋諸處復連敗之於蕭家山鸚鵡山禽斬逾萬剷除省東賊壘百餘西北兩方賊仍負隅拒守毓英令副將楊玉科總兵李維述等規迤西與騰越義兵約期並進於是副將張保和等克富民昆陽總兵馬忠等克呈貢晉寧易門激江祿豐玉科等克武定祿勸元謀羅次定遠大姚維述等克廣通楚雄南安及黑琅元水諸井凡悍酋劇匪禽斬殆盡省城解嚴被詔嘉獎九年激江回復叛踞府城毓英率軍往勦圍其郭十年二月克之並拔竹園江那諸賊巢迤西軍亦克麗江劍川永北鶴慶賓川姚州鎮南諸城疏言滇省前事之誤東南未定遽議西征屢致喪師失地今通籌全局必先掃蕩東南兩迤然後全軍西上方無後顧之憂十一年迤東迤西兩路悉平西軍亦先後克復永昌鄧川浪穹趙州雲南永平蒙化及上下兩關而大理賊猶堅守恃騰越順寧互爲應援十一月毓英親往督戰先斷賊援直薄城下掘隧道陷城垣數十丈奪東南兩門入賊守內城晝夜環攻守陴賊多死杜文秀窮蹙服毒其黨昇之出城詐降斬首傳

示勒繳軍械賊黨猶請緩期毓英令楊玉科率壯士二百入城受降布重兵城外夾擊之斬酋目三百餘名生禽楊榮蔡廷棟馬仲山磔於市大理肅清賜黃馬褂予騎都尉世職十二年順甯雲州騰越皆下全滇底定加太子少保晉一等輕車都尉世職十三年兼署雲貴總督光緒二年丁繼母憂二年服闋授貴州巡撫加兵部尚書銜七年調福建督辦臺灣防務開山撫番濬大甲溪築臺北城八年署雲貴總督九年實授法越兵事起自請出關赴前敵屯興化十年命節制關外粵楚各軍會廣西軍潰於北甯太原毓英全師退屯保勝以未奉命降二級留任七月命進軍決戰連復越南館司鎮安清波夏和諸縣屯館司關規取河內諸省令丁槐何秀林攻宣光以地雷毀其城禽斬甚衆十一年京察開復降級處分令覃修綱攻克緬旺清水清山法兵援宣光掘地營延袤十餘里扼之破法兵於臨洮府奪梅枝關連克不拔廣威永祥進擣山西河內廣西軍亦收復諒山越南興安寧平南定興化太原各省聞風響應會和議成詔班師五月回駐邊關十二年會勘邊界兼署巡撫十三年剿順甯猓黑夷匪張

登發平之十四年京察議敘十五年皇太后歸政晉太子太保尋卒贈太子太傅入祀賢良祠雲南貴州建專祠諡襄勤子春煊官至四川總督弟毓寶從毓英轉戰雲南功最著累擢道員賜號額圖璉巴圖魯光緒十年出關援勦宜光臨洮旋克廣威府不拔縣梅枝關賜黃馬褂十四年授福建鹽法道擢雲南按察使權布政使護巡撫兼護總督二十一年調貴州布政使未行復調雲南毓寶勇於戰陣不諳文法御史溥松勅其護總督時任用私人政刑失當坐奪職卒於家雲貴總督崧蕃疏陳毓寶戰功詔復原官

論曰劉長佑樸誠廉毅老於軍事時病其失之慈柔自言於是非邪正不自欺以欺人非飾辭也滇粵籌邊尤有遠見劉嶽昭治滇能屈己以聽岑毓英毓英與滇事相終始跋扈新才竟成戡定偉績信乎識時之傑能自樹立者已

清史稿

列傳二百七

韓超

田興恕

曾璧光

席寶田

韓超字南溪直隸昌黎人道光十四年副貢二十二年天津治海防超詣軍門獻策事平獎敘州判尋以府經歷揀發貴州歷署三角屯州同獨山知州獨山多盜號難治超募勇訓練用土民爲鄉導禽其渠胡林翼守黎平深倚重之言之巡撫蔣蔚遠超由是知名咸豐元年烏沙苗倡亂超從林翼進剿馳風雪中先後斬獲數百人餘黨悉平論功以知縣用二年署清江通判知黔將亂捐俸募勇士八十人練成勁卒四年獨山土匪結粵匪內犯超率兵練迎擊分軍出賊後攻其不備禽賊首楊元保復深入廣西南丹州境擊諸匪平之加同知銜賜花翎桐梓匪楊鳳竄永甯合黔西匪王三扎巴連陷數城圍遵義超馳至敗賊南關陣斬王三扎巴立解城圍復追敗諸葛章司河禽楊鳳斬之餘黨盡殲擢知府五年苗亂蔓延超馳援台拱解黃平平越圍轉戰至施秉鎮遠賊壻山

斷道以阻官軍超以孤軍馳突其間大小數十戰補石阡知府超性剛直有膽略每與上官爭執是非上官責以勦賊而斬其餉餽師轉戰往往求協助於鄰省四川總督駱秉章湖北巡撫胡林翼交章論薦侍郎王茂蔭亦疏薦之詔下巡撫問狀以道員記名九年授貴州糧儲道時苗教各匪連陷諸郡縣駐軍印水汛扼其中使苗教不得合且遏其下竄湖南之路賊出全力撲之超約楚軍夾擊賊大潰勦思州響鼓坪施秉土地坪鎮遠金鼎壘鋒嚴壘唐家營壘諸賊巢禽賊目張東山歐光義等鎮遠所屬皆平民團舊以十戶養一莊丁超因其意稍變通之官募士而民輸糧又籍叛產分授降衆流人以田代餉行之二年得兵三千人自軍興協餉不至地方官吏爭抽取釐金以爲補助超建議釐金統一抽之後不復再抽商無滯累餉用差給十年命幫辦貴州勦匪事十一年署按察使提督田興恕疏陳超前後戰功加布政使銜賜號武勇巴圖魯詔予二品頂戴署貴州巡撫田興恕方以欽差大臣督辦軍務超久在行間亦以肅清全黔爲己任同治元年田興恕罷乃命超辦理防勦事宜時尙大坪玉華

山兩處爲賊巢遵義安順思南大定銅仁石阡諸府所在皆賊五月回匪陷興義雲南叛回潰勇擾境粵匪亦由川竄至正陽廟堂並桐梓松坎諸地超令總兵吳安康進勦用內應夜縱火攻破賊巢禽匪首倪老帽斬之出難民二千餘人六月閔家場踞賊糾集苗教諸黨偪江口天柱匪首亦糾合土匪攻陷縣城分股竄湖南晃州廳高寨陷印水青谿兩城謀截楚軍糧道超令總兵羅孝連道員趙國澍進攻安順狎匪夷其壘禽斬賊酋章登鳳等尙大坪賊復約苗教分掠江內超令孝連斷其歸路國澍等馳軍迎擊復令副將趙德元出冷水河梯子巖進襲尙大坪立破之印水汎城同時克復進平玉華山賊巢攻拔瓦寨復天柱縣城特詔嘉獎道員鄧爾巽總兵李有恆破王家苗寨夾馬洞諸賊巢獲其酋李玉榮等黃白號教匪竄遵義知府李德我擊破之於三臺山奪五里坎諸隘口副將周宏順進攻石阡毀老王壘賊巢諸壘就撫石阡桐仁苗匪攻毀鎮遠營壘印水戍軍亦潰遂南掠松桃北攻天柱湖南援師至賊始引去詔斥超專恃援軍有負疆寄雲南方議撫回巡撫徐之銘咨會停剿而回匪益恣

竄陷安南興義分擾耶岱永寧歸化韶原其誤信撫議免議處石達開自川回竄分三路一走遵義一走黔西一走桐梓遣沈宏富李有恒余祖凱擊之田興恕以教案獲譴去官黔軍益單二年乞病回籍光緒四年卒於家年七十有九詔念前功賜卹諡果靖貴州請建專祠並附祀胡林翼祠

田興恕字忠普湖南鎮筵人年十六充行伍隸鎮筵鎮標咸豐二年從守長沙賊屯湘江西岸軍中募敢死士夜驚賊營興恕請行夜浮小舟往潛燬賊營賊騎數百追之泗水免巡撫賂秉章奇之委充哨官五年從克郴州六年領五百人號虎威營從蕭啓江援江西克萬載袁州七年戰上高英岡嶺深入被圍左手受創亡馬步戰他將馳救救得免是役以少擊衆斃賊千數進攻臨江掘地道轟城先登再被創賊死拒未下援賊大至啟江議暫退興恕不可曰兵在精不在多願爲前鋒率所部直貫賊陣賊張左右翼圍之後軍望見興恕旗指東麾西賊皆披靡夾擊賊大敗竄走遂復臨江八年克崇仁樂安宜黃南豐積功至副將加總兵銜賜號尙勇摯勇兩巴圖魯貴州苗教匪熾黎平府被圍久興

恕奉檄赴援至即攻破賊營連戰三日而圍解進克古州永從署古州鎮總兵九年石達開圍寶慶興恕率四千五百人赴援扼九壩橋無日不戰歷月餘糧藥將罄選死士欲以一戰決勝負會李續宜援軍至內外夾擊燬附城營三連日攻下勢如破竹達開竄廣西遂移軍靖州防黔邊命署貴州提督督辦貴州軍務增軍盈二萬十年道銅仁取印江分軍略思南石阡進克貓貓山賊巢石達開由廣西入貴州連陷數縣省城大震巡撫劉源瀚趨赴援興恕奏言黔省上游道路分歧賊若以一軍擾黔一軍入蜀道遠兵單斷難兼顧已檄韓超防鎮遠沈宏富守湄潭劉義方進松桃臣駐石阡居中調度賊如上竄則親會川軍以攻之窺楚即馳還靖州時興恕已實授提督詔授欽差大臣命援省城師至部署省防督軍赴定番迎剿賊棄城而走十一年兼署巡撫時回仲苗教諸匪分擾上下游幾無完土興恕分兵援剿戰屢捷招撫匪首唐天佑賈幅保陳大六柳天成等克復歸化荔波定番廣順獨山諸城疏通驛路軍威漸振興恕年甫二十有四驟膺疆寄恃功而驕又不諳文法左右用事屢被論劾乃罷兼

職以韓超代之同治元年罷欽差大臣會法國教士文乃爾傳教入黔因事齟齬與怨惡其偏強殺之坐視職赴四川聽候查辦經遵義汪超值雲貴總督勞崇光爲賊所困興怨驟馬衝入大呼田某在此賊驚潰翼崇光出尋論罪遣戍新疆行至甘肅總督左宗棠奏請留防秦州十二年釋歸光緒三年卒於家曾璧光字樞垣四川洪雅人道光三十年進士選庶吉士授編修記名御史入直上書房授恭親王奕訢醇郡王奕譞讀咸豐九年出爲貴州鎮遠知府同治元年署貴東道二年剿平銅仁踞賊蕭文魁賜花翎雲貴總督勞崇光薦其才迭署糧道按察使布政使六年予二品頂戴署貴州巡撫七年實授貴州地瘠亂久北境接四川東境接湖南軍事悉倚鄰援本省餉既艱窘將多驕蹇總兵林自清劾罷後戕興義縣令率所部萬人擾川境八年璧光密遣提督陳希祥擒斬之令吳宗蘭勦青山餘匪克普安安南時席寶田軍已由東路進規台拱省城附近諸匪蹂躪出沒無常九年周達武調任貴州提督率川軍至貴陽漸次勘定自軍興鄉試久停至是年始補行人心益定與達武議增兵扼要駐守

令道員蹇開破遵義賊擒其酋吳三令提督劉士奇克都勻殲其酋吳章十年
令提督鍾有思等進剿上游克永寧威寧下游諸軍擒悍賊潘得洪收復八寨
等城又收復上江下江三脚各城平上游鎮寧歸化賊巢殲永城踞賊侯大五
斬鄧岱金家硎踞賊金大七盤江北岸肅清又破畢節威寧諸匪清八寨三角
餘賊毀其巢令總兵何世華擊斬安南賊酋潘么進克貞豐西路悉平十一年
周達武率所部會楚軍定苗疆詔嘉調度有方予優叙十二年會滇軍克新城
老巢全省肅清加太子少保頭品頂戴予雲騎尉世職尋新城防軍索餉譁變
匪首何玉亭攻新城遣其黨黎正關攻興義分軍馳剿捕誅其渠事旋定光緒
元年卒於官追贈太子太保依總督例賜卹設文誠四川貴州請建專祠
席寶田字研菴湖南東安人諸生成豐二年率鄉團殺賊復縣城獎敘訓導六
年劉長佑援江西招參軍事遂從轉戰積功累擢同知直隸州九年石達開由
廣西犯湖南寶田從解寶慶圍擢知府十年駱秉章令募千人號精毅營防湖
南邊廣東賊犯郴州桂陽擊走之同治元年石達開復由廣西入境連敗之於

黔陽克來鳳以道員記名加按察使銜二年粵匪黃文金大舉犯江西命提督江忠義赴援寶田副之戰饒州桃溪渡大破之又迭破之於湖口洋塘石門青山橋賊引去趨池州圍青陽寶田襲石嶺破賊卡分軍遮其前合水陸夾擊文金遁走遂解青陽圍累功賜號業鏗額巴圖魯加布政使銜江忠義卒於軍寶田代領其衆留防江西三年李世賢黃文金復合犯江西將以遙掣江寧之師寶田逆擊白沙關奪楓橋要隘鈔擊於大清關泥嶺關賊竄山谷復金谿以按察使記名授雲南按察使時楊岳斌初至江西督辦軍務檄寶田援南豐坐遷延被劾降知府留軍會大軍克江甯羣賊擁洪秀全子福瑱逸出由開化犯玉山走瀘溪寶田邀擊於新城進至石城楊家牌禽洪仁玕洪仁政黃文英等福瑱匿山谷中捕得之檻送南昌伏誅詔復寶田原官予雲騎尉世職賜黃馬褂授貴州按察使時餘賊汪海洋等走廣東四年寶田自平遠邀擊降萬餘人又扼鐵石嶺降者二萬諸軍合擊於嘉應州全數蕩平論功江西軍以寶田爲第一詔以布政使記名遇缺題奏軍事既定請回籍終養允之貴州苗教諸匪構

亂十有餘年東路素倚湖南援軍自粵匪平後議大舉勦平先是授兆琛爲貴州布政使偕總兵周洪印率師往積歲無功李元度圍剿竹園亦久不下巡撫李瀚章劉峴先後劾罷兆琛洪印元度亦鑄級薦起寶田招集舊部萬人入貴州總統東路諸軍六年冬進軍石阡荆竹園爲教匪老巢寶田審視地勢高峻匪砦環列惟北面平夷可掩入七年元旦進攻部將黃元果先登諸將肉薄壘下一日平十八砦克荆竹園禽斬匪首蕭桂盛何瑞堂其旁三十六砦相繼攻下捷聞被珍寶夏進規寨頭寨頭爲苗疆門戶諸苗孥貽資糧所萃連拔東西三屯陣斬苗酋桂金保破援賊張臭迷攻下台笠丁耙塘諸砦遂克寨頭分軍克天柱斬其酋陳大六會丁繼母憂回籍治喪提督榮維善暫領其衆尋詔奪情趣赴軍進攻台拱台拱苗最强踞清江鎮遠二城爲犄角寶田請增兵萬人按察使黃潤昌道員鄧子垣領之出晃州爲北路寶田自富南路令榮維善用鳩勦法轉戰山谷間破諸苗砦漸近鎮遠潤昌子垣由思州進攻鎮遠府城克之八年二月維善連破董教公鵝兩隘遂克清江廳城兩軍合趨黃飄山地狹

岐人行頂趾相接遇伏維善軍疾行先出險潤昌軍誤以爲陷伏中爭道相擠爲賊所乘潤昌子垣皆戰歿維善聞變率二百人馳救被圍爲苗所禽遇害於是苗氛復熾張秀肩犯巴治寶田親督軍擊走之進克稿米令襲繼昌蘇元春破苗寨擊走張臭迷等分軍守鎮遠施秉時以寶田軍苦戰年餘尙未深入議罷其軍劉岷仍主專任復增兵萬人分三路進九年會攻施洞克之苗走九股河白洗苗來援擊敗之進攻台拱破革夷諸砦薄台拱城下苗棄城走克之加頭品頂戴進軍九股河分別勦撫凡平黑苗砦二百餘所難講丹江苗皆請歸化十年進攻凱里一鼓而下苗潰走雷公山屬衆六七萬人黃茅嶺雷口坪九眼塘燕子窩諸寨皆絕險寶田督諸軍冒暑入山合擊張臭迷斬敵三萬燔其廬舍勦洗一空駐軍施洞口寶田遽病風痺乞假醫療命部將襲繼昌蘇元春唐本有謝蘭階分統其軍軍事進止機宜仍稟命於寶田十一年三路進兵凱北以北悉定合攻烏雅坡諸酋皆在以長圍困之迭戰斬九大白巖大五於陣先後降者數萬四月禽張秀肩楊大六金大五等檻送長沙伏誅張臭迷先逸

捕得戮之諸酋或降或斬無脫者苗疆平詔晉寶田騎都尉世職家居養病光緒十二年詔以寶田前禽洪福瑱功命晉國荃繪其像以進十五年卒贈太子少保優卹原籍及江西貴州建專祠

論曰貴州之匪總名有六曰苗匪教匪曰黃號白號其小者曰橫匪狎匪其他濫竽游勇逆回悍夷揭竿踵起不可悉數始於咸豐四年無兵無餉不能制也韓超有辦賊之才久屈下僚事權不屬田興恕入黔兵威始振超亦驟起未久相繼去張亮基治黔數年亦僅補苴中原大定晉國藩乃議以湖南兵力餉力爲平黔根平而賂秉章亦令劉嶽昭勦黔北以保川邊後專倚席寶田戡定苗疆自周達武以川兵川餉濟黔之不及晉璧光賴之以竟全功蓋閱二十年而後大定古云蠻夷之人先叛後服蓋以地勢使然然使若韓超者早膺豈寄其延禍或不致如是之甚弭亂之道在得其人用人之道必盡其才固古今不爽者爾